

金

罍

子

金罍子下篇卷之三十三

明上虞陳絳用楊甫著

會稽陶望齡周望甫閱

同邑車任遠遠之甫校

男陳昱輯

毛

古人席地而坐

古人席地而坐。自秦漢猶然。況鴻門之會。項王留沛公飲。項王項伯東鄉坐。亞父南鄉坐。沛公北鄉坐。樊將軍入項。三廼按劍而跪。何以跪爲。方坐於地。驚見噲入。故按劍作色。欲起爲踞勢也。武帝時武

安過魏其飲酒酣武安起爲壽坐皆避席伏及魏其爲壽惟故人避席餘半膝席何以避席伏因皆坐地爲敬之至不敢安席就伏於地以迎之也何以膝席一膝着地不離席一足跂以相迎也

朱子謂古人只是跪坐雖有共壁以先乘馬不如坐進此道謂跪而獻之也文帝不覺膝之前席蓋亦是跪坐又曰古人坐於地未必是盤足只是跪以其慣故脚不痛所以拜時易也又著跪坐拜說云兩膝着地以尻着膝而稍安者爲坐伸腰及股而

勢危者爲跪。因跪而益致其恭。以頭着地爲拜。則謂跪坐拜三者體勢本不甚遠。故跪亦可坐。坐亦可拜。蓋不主於盤坐。又引管寧坐一木樹積五十年。未嘗箕股。其榻上當膝處皆穿。則雖後漢時已有木榻。不必橫席於地。然亦是跪坐也。他日有問盤坐於理有害否。則又答曰。古人席地亦只是盤坐。又有跪坐者。君前臣跪。父前子跪。兩膝頭屈前着地。觀畫圖可見。據此則古人之坐原有兩般。盤足而坐爲安坐。蓋席端尊長則然。其卑幼侍坐亦

只如跪謂之跪坐以示不敢安席兼尊長之前可
跪可拜也觀曲禮云坐毋箕謂舒展兩足狀如箕
舌蓋盤足則易箕故戒之也

授坐不立

授立不跪則古人卑幼之坐雖只是跪坐
竟亦有坐有跪原是兩般伸腰及股而屈其膝以
着於地謂之跪亦謂之坐屈膝着地而尻着於兩
蹠謂之坐不可謂之跪記如云侍坐於先生侍坐
於君子皆坐也至曲禮先生書策在前坐而遷之
少儀尊長寢則坐而將命又賜者既致命坐委之

吉者
婦人
拜礼

受立授立不坐。玉藻臣侍君燕退則坐取屨隱辟而後屨坐左納右坐右納左此皆跪也。

少儀婦人吉事惟有君賜肅拜爲尸坐則不手拜肅拜爲喪主則不手拜。鄭注肅低頭也。手拜手至地也。婦人以肅拜爲正凶事乃手拜耳。爲尸爲祖姑之尸也。士虞禮曰男男尸女女尸爲喪主不手拜者爲夫與長子當稽顙也。其餘亦手拜而已。疏正義曰此一節論婦人拜儀。又曰此手拜手至地也。而周禮空首拜。鄭注云頭至手先以手至地而頭

來至手。故兩注不同。其實一耳。婦人以肅拜爲正。言肅拜是婦人之常。而昏禮拜扱地以其新交爲婦盡禮於舅姑故也。左傳穆嬴頓首於宣子之門者。有求於宣子。非禮之正也。按此一節。註疏解婦人拜禮之常。且盡其變。可謂無餘蘊矣。朱子語類一段。乃更爲兩膝齊跪。手至地而頭不下。爲肅拜。拜手亦然。則以肅拜卽拜手。與古注不同。不知何據。前一段卽云只低首祇揖。便是肅拜。引鄭注。但俯下手。今時擡意。蓋定論也。

朱子謂古者婦人與男子爲禮皆俠拜。每拜以二爲禮。昏禮婦二拜夫。答一拜。又拜二拜夫。又答一拜。冠禮母見子亦俠拜。予謂使男女相見。男一拜而女兩拜。雖尊男卑女。乾坤之義然施諸一時。殊不酬副。此惟夫婦猶可。而母至以見其子。不亦重乎。按少儀婦人吉事。雖有君。賜肅拜。肅拜鄭云但頰下手。今時搢孔氏陳氏云。如今婦人不跪地而拜。朱子亦云肅拜只是低頭祇揖。蓋婦人首飾盛多。如副笄六珈之類。自難俯伏地上。則古者婦人惟

肅拜但立於地小低頭下手不跪不伏却容易必
再拜始得當男子之一拜所以必俠拜者有由然
與昏禮則又云舅姑旣歿婦入三月乃奠采婦拜
扱地注扱地手至地也疏婦人肅拜爲正扱地則
猶男子之稽首拜中之重以其新來爲婦盡禮於
舅姑故也少儀又云爲喪主則不手拜注手拜手
至地也婦人以肅拜爲正凶事乃手拜耳爲夫與
長子之喪當稽顙故不手拜按二禮云然則婦人
惟凶喪乃有手至地之拜卽周禮九拜之空首而

昏時廟見舅姑及爲喪主則又有稽顙之拜卽
拜之稽首此外則惟有肅拜耳然宋太祖嘗問趙
普拜禮何以男子跪而婦人不跪普問王貽孫對
曰古詩長跪問故夫婦人亦跪也唐武后時婦人
始拜而不跪普問所出對曰唐張建章渤海記備
言之夫論拜禮不攷禮而証諸詩古詩莫出於漢
魏之間則其時風俗之變有非三代之古初者不
獨此一事也然禮稱授坐不立授立不跪凡授坐
則跪無間男女至男女以喪祭而相授器則女受

以篋其無篋則皆跪奠之而後取之。女曷嘗無跪。但不以此爲拜耳。況古者席地而坐。方夫婦交坐。因事更端。欲起不起。微作拜勢。以致其恭。正可謂之跪。而不可謂之拜。如鴻門之讌。項王已東嚮坐。及見樊噲入。則按劍而跪。豈是拜耶。故朱子謂古樂府亦只說長跪。不曾說伏拜。古人坐也是跪拜。亦容易。正不當以是謂婦人之跪拜。而晉書賈克傳克後妻郭槐。盛威儀。往見克。前妻李旣入戶。李出迎。槐不覺屈膝。因遂再拜曰。屈膝而後再拜。或

古之肅拜。今之揖亦未免少屈其膝。未必便爲伏地之拜。或遂伏地爲男子之拜。皆不可知。意漢魏已降。此禮已少變。鄭注肅拜已爲今時揖。則當時必別有婦人之拜。如男子然。而變之未通周天元帝。又始令婦人拜天臺。及命婦朝見跪伏。一如男子。至於晚唐。而王建宮詞有男兒跪拜謝君王之句。迤邐至宋太祖。又有拜禮婦人不跪之問。朱子亦謂不知婦人不跪地。而變爲今日之拜者。起於何時。則唐及五代宋世婦人之拜。已又一變復古。

母敬
子初
冠

貽孫旣爲建章所誤而程泰之復爲貽孫所誤遂
指聖王典禮槩誣以爲賊后之制則亦失攷之過
也

一處云太祖嘗問拜於范質姪杲杲對云云

冠儀見於母母拜之朱子曰禮初冠母子相拜不特
君臣相答拜也孔氏正義則曰按儀禮廟中冠子
以酒脯奠席訖子持所奠酒脯以見於母母拜其
酒脯重從尊者處來非拜子也今唐禮母見子但
起立不拜也孔說爲精杜佑通典則曰九拜之儀
肅拜今揖也尊屬析其備禮念其成人以揖示敬

合拜
不是
交拜

在禮非爽便同匹敵竊謂不然

鄉射禮稱賓再拜主人答再拜主人再拜賓答再拜而鄉飲酒禮但稱主人再拜賓答拜是主人再拜賓止答一拜也又二禮但稱賓西階上拜主人少退主人阼階上拜送爵賓少退少退云者蓋不敢正當其拜乃歛躬逡巡以示不安是又并不答拜也又主人西南面三拜衆賓衆賓皆答一拜是衆賓於主人三拜止答其一古人最重納拜今乃使賓主時時獨拜堂上此禮可復施之今日乎其答

拜朱子以爲主客列兩邊主人一拜客答一拜主
又拜一拜客又答一拜却不交拜又皆比嚮拜不
相對又曰某赴省試時衆士人拜知舉知舉受拜
了却在堂上令衆人少住使人大喝云知舉答拜
方拜二拜是古拜禮猶有存者近年問人則便是
交拜是二三十年間此禮又失了愚謂此禮之失
亦謂人情終不相安耳畢竟古之答拜何似今人
之交拜也又按世語王渾爲徐州刺史納後妻瑯
琊顏氏女交禮拜訖王將各拜觀者咸曰王侯州

九拜之名

將新婦州民恐無由答拜可見晉時答拜猶不是
今之交拜

周禮大祝辨九拜一曰稽首謂頭至地稽留多時臣
見君之拜二曰頓首謂以頭叩地卽舉平敵相見
之拜三曰空首謂以兩手拱至地乃頭至手所謂
拜首也君答臣之拜四曰振動謂戰栗變動而拜
五曰吉拜拜而後稽顙謂齊衰不杖以下者之拜
卽殷之凶拜而云吉者對下文凶拜爲輕也六曰
凶拜稽顙而後拜卽三年之喪拜也七曰奇拜謂

君答臣一拜。八曰褒拜。褒讀爲報。報拜謂再拜。拜神與尸也。九曰肅拜。謂揖拜。但頰下手。禮介者不拜。故軍中及婦人之拜也。此九拜。稽首於拜中至重。肅拜至輕。稽首頓首空首及肅拜爲正。其餘五者。逐事生名。還依四種正拜而爲之。振動附稽首。吉拜附頓首。凶拜亦附稽首。奇拜附空首。褒拜亦附稽首。拜古文作擗。然奇拜。朱子依杜子卷註以爲先屈一膝。唐人謂之雅拜。

南北士大夫相見禮。考儀禮士相見。主人揖入門右。

主客
禮左右

賓奉摯入門左曲禮凡與客入者每門讓於客客
至於寢門則主人請入爲席然後出迎客客固辭
主人肅客而入主人入門而右客入門而左主人
就東階客就西階呂氏春秋魯季孫有喪孔子往
弔之入門而左從客也則今惟北猶爲得禮意南
乃以東讓客非也

主客
東西
之位

禮記主人就東階客就西階古者賓位尚右以西爲
尊雖漢猶然漢書韓信傳信解廣武君縛東鄉坐
西鄉對而師事之王陵傳項羽取陵毋置軍中陵

使至則東鄉坐陵毋欲以招陵周勃傳勃不好文學每召諸生說事東鄉坐責之趣爲我語田蚡傳蚡自以漢相至尊自坐東鄉坐其兄蓋侯北鄉蓋寬饒傳許伯請之寬饒乃往從西階上東鄉特坐王尊傳尊劾丞相衡正月行幸曲臺臨饗罷衛士衡與中二千石大鴻臚賞等會坐殿門下衡南鄉賞等西鄉衡更爲賞布東鄉席延賞私語衡知行臨百官供職萬衆會聚而設不正之席使下坐上相比爲小惠於公門之下樓護傳護嘗客成都侯

將相
東向
臨下

王商商子邑爲大司空父事護時請召賓客邑居
樽下稱賤子上壽護東鄉正坐字謂邑是皆以西
上爲尊也。今俗謂主人東道客曰西席本此然賓
主揖儀惟有南北無復東西鄉之坐矣。蓋古者南
面北面。惟施於君臣之際。若賓主相鄉則惟有東
西也。

雍也可使南面邵子經世以爲可使從政是不考也
古者惟天子諸侯南面取向明而治。人臣雖尊位
皆北面。臨民從政則尚東面。戰國至秦漢皆然。雖

唐猶然故趙括母曰。今括一旦爲將軍。東向而朝。羣吏無敢仰視者。是將之貴東面也。田蚡自以漢相至尊。自坐東鄉。坐其兄蓋侯南鄉。是相之貴亦東面也。韓退之送幽州李端公序。上堂卽客位。必東鄉。是唐時諸侯尊禮王人。亦皆東面也。

乘車
尚左

古人道尚右。乘車則尚左。尊者處左。故戰國魏公子無忌從車騎。虛左自迎。侯生秦王納茅焦之諫。自駕虛左。方往迎太后。皆爲將處尊者於左。故虛之也。候人於車下。亦曰道左爲尊者在焉。故也。

將相
稱至
尊

容齋續筆謂陳壽三國志獨吳書稱孫權至尊以爲
疑愚按至尊自是漢世所嚴事之通稱非必天子
也田蚡傳蚡自以稱相至尊自坐東鄉是丞相稱
至尊也樓護傳主簿諫王商將軍至尊不宜入閭
巷是將軍稱至尊也方漢建安年權已爲將軍何
詎不稱至尊也

官府
皆名
曰寺

石林燕語謂東漢以來九卿官府皆名曰寺與臺省
並稱今按范曄漢書光武幸南頓縣舍置酒高會
父老前叩頭言皇考居此日久陛下識知寺舍又

馬援傳曉狄道長歸守寺舍樂恢傳父親爲縣吏得罪於令收得殺之恢年十三常俯伏寺門皆謂縣也不獨九卿注引風俗通云寺司也諸官所止皆曰寺

后朝
殿
宮
都
因
漢

古臣下皆稱后。虞書后稷是也。又畢命三后協心同底於道。謂周公君陳畢公。甫刑三后成功。惟殷於民。謂伯夷禹稷。古者見所尊敬則稱朝。有期集亦曰朝。王制命鄉以告耆老。皆朝於庠。呂覽堯朝許由於沛澤之中。列子尹儒夜夢受秋駕於其師明。

日往朝其師漢書張蒼爲丞相洗沐嘗先朝陵夫人上食臨邛令繆爲恭敬日往朝司馬相如後漢書任延拜會稽都尉署吳人龍丘長議曹祭酒丘長卒延自臨殯不朝三日晉書庾亮領江州褚裒時爲豫章太守正旦朝亮是也人子見其父母亦曰朝內則由命士以上父子皆異宮昧爽而朝是也郡縣庭亦曰朝會稽若耶山老叟謂太守劉寵曰山谷鄙生未嘗識郡朝是也古者室之高嚴皆曰殿不必宸居漢書黃霸令郡國上計吏條對有

舉孝子者先上殿注殿丞相所坐屋後漢蔡茂夢
坐殿極上注屋之大者通呼爲殿是也宮穹也屋
見於垣之上曰宮士庶通謂之宮禮記東宮西宮
儒有一畝之宮孟子舍皆取諸宮中是也使節所
蒞亦得稱都後漢臧洪爲東郡太守都東武陽是
也士大夫導從威儀稱鹵簿南史宋顏延之子竣
貴重延之乘羸牛敝車逢竣鹵簿避之是也人臣
之章亦稱璽書魯語襄公在楚季武子取卞使季
冶逆追而予之璽書是也人臣下教所屬亦稱勅

勅奏顧命大行

書。漢陳萬年傳公移勅書曰云是也。臣下相通
書記亦曰奏。漢桓譚以大司馬董賢聞名欲與之
交。譚先奏書於賢。後漢龐參奏記於鄧騭。是也。相
關白事亦曰奏。褚先生謂魏丞相相其人好武。皆
令諸吏帶劍。帶劍前奏事是也。臣下臨死之言亦
稱顧命。禮記緇衣葉公之顧命是也。人臣初薨。殯
亦曰大行。漢韋玄成父賢病篤。兄弘坐宗廟事係
獄。賢卒。賢門下生博士義倩等共矯賢令使家丞
上書言大行以玄成爲後是也。人臣之墓亦得稱

諒闇
至尊
萬歲
皆通
稱

金匱子下篇

卷之三十三

陵曹操經過喬玄墓爲文以祭之曰北望貴土乃
心陵墓是也人臣居喪亦稱諒闇晉武帝詔山太
常雖尚居諒闇是也臣下相頌祝亦得稱萬歲東
觀記吳良爲郡議曹掾歲旦與掾史入賀太守門
下掾王望言明府視事五年五穀豐熟家給人足
今日歲首請上雅壽掾史皆稱萬歲是也人臣亦
得稱至尊漢書樓護傳主簿諫王商將軍至尊不
宜入閭巷是也

記君天下曰天子臨諸侯畛於鬼神曰有天王某甫

天子

崩曰天王崩。告喪曰天王登假。蔡邕獨斷曰王畿
內之所稱天王。諸夏之所稱天子。夷狄之所稱賈
逵曰畿內稱王。諸夏稱天王。夷狄稱天子。杜預曰
施於夷狄稱天子。施於諸夏稱天王。施於京師稱
王。蓋天王之爲號。與王俱矣。王者天子之定號也。
天子之所稱。與稱於天子之畿內則曰王。王者
殊號也。稱於諸侯之國。與諸侯之國稱之則曰天
王。春秋魯史也。稱天王。魯史之舊文也。有王而不
天者。史文偶失之也。

後世以父呼臣下

禮天子稱同姓諸侯曰伯父。小國曰叔父。其稱異姓則曰伯舅。叔舅。不曰父也。士冠禮。字辭伯某甫。仲叔季惟其所當注。甫字或作父。故太公姜姓名牙。一名望。尚字武王曰尚父。管夷吾字仲齊。桓公曰仲父。孔子字仲尼。魯哀公曰尼父。皆待以師友之名。父亦甫耳。後世不解。槩以父呼臣下。見謂尊寵。秦始皇謂呂不韋仲父。晉元帝謂王導仲父。唐肅宗謂李輔國仲父。代宗謂郭子儀尚父。僖宗謂田令孜尚父。昭宗謂王行瑜尚父。梁太祖謂錢鏐尚

莊公
稱惲
叔量

父嗚呼臣父乎。齊東莦人之陋也。父臣乎。則張常侍我父之衰醜也。

春秋衛莊公銘孔惲於冢一則曰叔舅二則曰叔舅按左氏孔惲寔莊公姊伯姬之自出伯姬潛入蒯瞶於孔氏逼其子而盟之故孔惲出輒而立蒯瞶是爲莊公莊公旣立而德孔惲因爲之銘如此則惲親莊公甥公銘惲反謂叔舅亂名實矣以是知周室天子凡稱於同姓之諸侯曰伯叔父稱之異姓曰伯叔舅皆全不顧倫行徒謾爲好詞以相要。

帝父
稱太
上皇

此文勝之弊也其流至於漢呂氏遂娶張敖女配
惠帝乃以甥妃舅鳥獸亂而不耻也

後世尊皇帝曰上故秦始皇追尊其父昭襄王爲太
上皇漢高祖於太公亦如之所謂因上以生名然
皆皇而不帝不兼三五之號蓋父子之間猶慎別
也如此魏靈太后追崇母皇甫氏秦太上君及父
胡國珍薨追崇太上秦公夫施太上之號於臣妾
胡姬之變禮也宋安南國王陳日照傳位其子求
封太上國王下省官議秘書正字歐陽守道謂非

便。南越尉佗嘗自稱蠻夷大長老。正南夷事也。禮
方伯自稱曰天子之老大夫致仕曰老。自稱亦曰
老。漢亦有老上單于之號。易太以老無損。或去上
字存其太字。稱太王則有古公太王。且三太三少
太宰少宰。太所以別於少也。太以尊言則太后太
妃太子太孫。以卑言則太史太卜太祝樂太師太
圉。上下所通用也。當時守道以病足不及與議。然
詞嚴義核。反覆證引。辨析於一字之間。可謂篤論
周人並建三公。而以公一人領冢宰爲相。故後世曰

公相
相公
之稱

宰相曰公相曰相公所自始。至召公以西伯相。則謂之伯相。周書顧命篇伯相命士須材是也。三國魏司馬昭以相國進爵晉王。南宋義康以彭城王領相。則當時謂之相王。荀顗謂王祥云。相王尊重。殷景仁密啓文帝云。相王權重是也。宋賈似道以太師平章軍國重事。則一時詔命。又謂之師相。而蔡京又自以太師領宰相。令人只呼已公相。不得呼相公。以太師是三公故耳。秦檜亦然。大抵宋世宰相皆稱相公。凡使相亦稱相公。惟以三公正真。

上柱
國為
人臣
極皆

相之位者。乃曰公相云。

上柱國為本朝大臣勲階之極。相傳凡陞躋此級。立就顛躋。動或奇慘。故從來公卿多不受之。然其辭但宜以盛滿崇亢無功德而繆膺躋居為戒。乃或曰正名謹嫌。上字非臣下所蒙。則諛且誣矣。上者對下而言。如加片席於地。卽席乃地之上也。豈必至尊太上哉。周禮上公上卿上大夫上士。後世相或曰上相。將或曰上將。何嘗諱耶。周宣帝自稱天元皇帝。因不聽天下有天高上大之稱。凡官名

有犯皆改之。此昏猜多忌之政。而大臣以此從吏其君父不可之大者矣。

縣令
長者
異

漢有稱某縣令某縣長者。按西漢書縣令長皆秦官。掌治某縣萬戶以上爲令。秩千石至六百石。減萬戶爲長。秩五百石至三百石。又東漢書百官志。每縣邑大者置令一人千石。其次置長四百石。小者置長三百石。此縣令長之異。

大人
長者
之稱

韓歆性剛直。岑彭嘗對光武稱爲南陽大人。蘇竟祖父純字桓公。性強固而持毀譽。士友憚之。至相謂。

見桓公患其數責人不見又思之三輔號爲大人
西漢每頌人必曰長者取其忠厚東漢之大人推
其正直所尚異也

金壘子下篇卷之三十三

金學子下篇卷之三十四

明上虞陳絳用楊甫著

會稽陶望齡周寧甫閱

同邑車任遠遠之甫校

男陳昱輯

稱翁
不可
不慎

公與翁皆父稱也。公猶不同。以爵有三公之公。有五等諸侯之公。以齒德。漢董公申公。唐房公。惟翁舍父無稱焉。是故不可以不慎也。夫父一而已。胡今之人擾擾皆父乎。蓋前此二三十年。士大夫書疏。

達於所尊猶稱公。昔司馬遷史記稱天子鉅公。晉
史孫惠上東海王越牋稱明公。王鑒上疏元帝時
元帝在瑯琊國亦曰明公。公之稱於人至不賤矣。
古者以天子諸侯王稱之。今稱之士大夫而不欲
則何也。則誠不知其惑之所自始。可怪也。或曰稱
翁不可與遜翁非與。曰朱子是時春秋六十六矣。
當慶元改元。寵臣佞倖逐宰相汝愚。朝事大變。人
情悚恐。先生草書萬言。將極言之。門人慮禍更入
諫。蔡元定請卦之。得遜之同人。先生默然。遂取諫。

父公
祖太
公

秦焚之。自號遯翁。蓋言老也。先生自是亦將去矣。若曰吾已爲人翁。筋力之禮。四方之事。非所任矣。此所以志也。夫禮。天子之大夫。致其事則稱老。未致其事。不敢稱老。父母在則恒言不稱老。謂有君父也。今斐然翁之稱於人。與倓然翁稱於人而居之。謂皆無君父可。

俗謂祖曰公。謂曾祖太公。按東漢書。侯霸子昱語王丹曰。家公欲與君結交。則父固稱公。李固女文姬嘆曰。太公以來。積德累仁。謂其祖邵。則祖父固曰。

叔姪
稱父
子

太公

爾雅父之舅弟。先生爲世父。後生爲叔父。而今世俗稱父之兄弟。率曰伯叔。兄弟之子曰姪。不曰昉。自何時。然五倫有父子。無伯叔姪。則是以父子該伯叔姪也。攷前漢疏廣。謂受曰。吾聞知足不辱。知止不殆。今仕宦至二千石。宦成名立。不去懼有後悔。豈如父子相隨出關。歸老故鄉。以壽命終。不亦善乎。受叩頭曰。從大人議。卽日父子俱移病。受廣兄子也。又後漢蔡邕。叔父質爲衛尉。與將作大匠楊

姪對姑之稱

球有隙球中常侍程璜女夫璜以邕前對金商門
言切直恨之遂飛章言邕及廢事於是詔下尚書
召邕詰狀而邕上書自陳願身當辜荷質不併坐
書中凡兩言父子皆叔姪也然則古人雖伯叔稱
父子

朱子云兄弟之子稱從子自曾祖而下三代稱從子
自尚祖四代而上稱族子愚意謂我姪者吾謂之
姪姪字亦只合從姑稱之耳顏氏家訓曰兄弟之
子比土多呼爲姪按爾雅喪服經左傳姪名雖通

男女並是對姑之稱

異姓之親
謂之

儀禮總麻三月姑之子注外兄弟也疏曰姑是內人以出外而生故曰外兄弟又舅之子注內兄弟也杜氏通典馮懷曰左氏傳聲伯以其外弟爲大夫所謂外弟蓋管于溪之子聲伯同母異父弟聲伯謂之外弟復謂聲伯爲外兄然則異姓之親通謂之外今謂舅子爲內兄弟末俗所云鄭玄還舉俗言以喻俗人非正名矣

舅姑猶云父母也舅舊也姑古也長老之稱也婦以

夫爲家。夫以婦家爲外家。故婦稱夫之父母曰舅姑。夫亦稱婦之父母曰外舅姑。夫婦判合爲一體也。今人以舅稱妻之兄弟。朱子語錄曰。據前輩但以兄弟稱之。妻亦稱夫之姊妹曰姑。然則據古人直當稱姊妹耳。漢書薛宣傳。敬武長公主曰嫂。何與取妹。曹大家女。誠亦稱嫂妹。其証也。伯叔者。兄弟之別名。故妻稱夫之兄弟曰伯叔。然古人稱其夫兄曰兄。公據此稱夫之弟。亦宜直謂之弟耳。稱其夫兄之妻亦稱嫂。張負以女孫事陳平。戒曰。汝

名

事兄伯當如父事嫂當如母

餘冬序錄謂古人姓氏各字不見於史傳而雜出於書疏記注者亡慮數十人今按鯀字熙禹名文命字密許由號箕公字仲武陽城槐里人出皇甫謐伊尹名摯見孫子仲雍宋衷曰字孰哉孰食曰雍夷齊之父姓墨台氏名初字子朝見史記索隱微子開卒立弟衍爲微仲而家語微子弟仲思名衍一名泄嗣百里奚字井伯出楚國先賢傳范蠡會稽典錄字少伯大夫種吳越春秋姓文字子禽此

石司馬彪云字伯夔高祖母嫗皇甫謐云王氏索隱云溫氏春秋握成圖帝王世紀云名含吕后父吕公相經云魏人名文字叔平吕后漢書音義云名雉索隱曰字娥姁皆序錄之所未及其他蓋未及考錄者尤多

參
義
之

曾子名參論語參音森而史記云字子輿則取驂乘之義宜讀如驂倉含切閔損字子騫騫馬腹虧也故爲損字而俗以騫爲飛騰則誤孟子名軻軻車接軸也平聲讀故字子輿一字子車而廣韻入箇

與惡
同名
彼累

韻曰孟子居轅軻故名何大行不加窮居不損氣象而不忘貧賤至以自名耶

時有兩曾參一曾參衛人衛曾參殺人於市而魯曾參遂傳殺人時有兩宰我一宰我齊人齊宰我爲人殺於朝而魯宰我遂傳爲人所殺與惡人同姓名且不可耶蓋宋建炎初權臣誤國六軍萬姓皆欲得而甘心焉者宰相黃潛善也倉卒御舟南渡而司農卿黃鑄之頭刎於江上鑄何罪焉以姓同故也紹興中奸人附和秦檜構陰謀逞宿憾殺岳

性價
張俊
名誤

孫懿
李賀
以姓
名見
傾

武穆者張俊也。今人率曰張浚也。則不幸姓同。其
名文字皆疑焉。夫名之一字。疑寡聞輕信者。猶肆
其無鬚之戮。況或同其姓名乎。

張無垢心傳錄。誤以黨王叔文之陸贄爲陸贄。近時
崔後渠追錄宋事。誤以殺岳飛之張俊爲張浚。吁
一字之誤。何啻曾參殺人耶。

後漢書崔駰爲侍中。時尚書有缺。詔將作大夫六百
石以上。試對政事。天文道術。以高第者補之。駰自
恃能高。而忌故太史令孫懿。恐有先用。乃紿懿曰。

圖書有漢賊孫登將以才知爲中書所害觀君表相似當應之因對之涕泣懿憂懼移病不試由是酺對第一拜尚書孫懿卽非孫登徒以姓偶同也唐元和中李賀以歌詩著名時元稹年老明經中第亦工篇什願與賀交執刺見之賀見刺曰明經及第何事來見李賀稹慚退未幾制策登科爲禮部郎官乃議賀父名晉不合舉進士時輩從而排之賀竟不第見康駢劇談錄蓋韓退之諱辨本此士懷忮心相傾乃至乘人姓名之間可謂儉巧若

王莽
名復

祖孫
世遠
同名
不害

懿之愚賀之傲則亦自有以取之非不幸也

王莽禁複名。故東漢以來因之多一字名者複名者
予僅見梁不疑成翊世孔季彦仲長統鄭玄子鄭
益恩孫鄭小同。北海孫賓碩薊子訓

宋宋偓初名延渥。以父名廷浩下字從水改爲偓彼
一名猶諱其旁側之嫌似若此李文靖祖名滔公
名復從水何耶容齊隨筆襄陽有隋處士慈羅君
墓誌曰君諱靖字禮而父亦名靖爲不可曉拓拔
魏安同父名屈同之子亦名屈祖孫同名胡人無

足言者。但羅君不應爾也。吁。至於祖孫父子同名。不益野於禮耶。酈道元水經注。元嘉中。檀和之征林邑。其王名楊邁。楊邁猶華言紫磨金也。出奔死。其太子初名咄代立。復改名楊邁。昭穆二世父子共名。所謂胡人無足言者。易歸妹之五曰。帝乙歸妹。孔子曰。自成湯至帝乙。帝乙湯玄孫之孫也。易帝乙卽湯也。殷錄質以生日爲名。順天性也。玄孫之孫。外恩絕矣。同以一日生天之錫命。疏可同名。故曰易之帝乙爲成湯書之帝乙。六世王同名不。

史記
諱談
字

兄弟
名取
偏旁
相近

害。然則祖孫世違同名不害。蓋亦殷道然也。

孔平仲謂太史公名談。故史記無談字。季布傳改趙談爲同子。予謂子嬰卽位。患趙高。乃稱疾不聽事。與宦者韓談及其子謀殺高。高上謁請病。因召入。令韓談刺殺之。見李斯傳。遷近諱趙談而遠忽韓談。何也。

今人命名。爲其兄弟。多取偏旁上下。字畫相近。或複名者。必同一字。蓋取其雁行排比。易爲叙列。若祖父子孫。則深避其似。蓋畏嫌也。不知昉自何時。審

古人未嘗有此如西漢陳遵而祖曰遂東漢馮勤之父曰伉而伉父偃黃瓊之孫琬張綱之子績陳球之兄子珪劉瑜之子琬任文公之父文孫皆未嘗避也惟晉王導三子曰悅恬協王洽二子曰珣珣王謚三子曰瓘珍琇毛穆之六子曰珍璩球璠璠王謚三子曰瓘珍琇毛穆之六子曰珍璩球璠璠璠璠謝安二子曰琰璠孫纂二子曰統綽卞壺四子曰珍璠璠子曰謝述三子曰綜約緯疑起自晉宋而不盡然如晉王昶父澤字季道而昶名其兄子曰沉字處道其子曰渾曰深而渾又名其子曰

濟王羲之之子曰悅之徽之獻之而徽之子曰禎之顧愷之之父曰忱之皇甫謐之父叔侯而祖父曰叔獻衛瓘字仲全玠字叔寶而祖父曰瓘字伯玉謝玄之從弟曰琰而玄子曰英陸玩祖父曰琨郭璞之父曰瑗孔愉之父曰恬袁湛弟豹而豹之子曰洵曰淑唐裴肅三子曰儔曰休曰隸而肅父曰修諸如此類不可殫錄然顏氏家訓近世有人制名兄弟皆山旁立字而有名峙者兄弟皆木旁立字而有名機者兄弟皆水旁立字而有名凝者

後世
取名
多諱

劉徐
謝諱
媛太
過

歎其不識字。然則以兄弟取字。偏旁相近而制名。蓋亦萌自魏晉之降。特未盛行耳。

大抵古人敦質。非若後世之多諱。然既遜異於父子。而復聯比於兄弟。因名定分。尊尊親親。於斯乎寓。則今人之義父母。乃優旃。

宋劉溫叟父名岳。終身不聽樂。不游嵩岱。每赴內宴。聞鈞奏。則涕泣移時。曰。若非君命。則不至是。徐節孝積。以父名石。平生不用石器。遇石則避之。不踐。或謂之曰。天下用石多矣。必避之。然後爲孝乎。他

日山行如何。仲車曰：「此吾私迹，則然。吾豈故避之哉？吾遇之則惕然傷吾心，思吾親，故不忍加足。」其二公他日若有君命，敢從私乎？二公至心獨行如之。其所謂見似目瞿，聞名心瞿者耶？然禮嫌名不避，春秋不諛，不諱嫌名。二公過矣。南史宋謝鳳子名超，宗謝莊子名朏。明帝嘗勅二人由鳳莊門入。宗曰：「君命不可以不往。」乃趨而入。朏曰：「君處臣以禮，遂不入。」時人以比之王陽王尊。夫君前臣名，公所無私諱，況嫌耶？以父嫌辭君命，非禮也。君子

謂拙之孝。又有二公之所不能者。

南宋袁粲幼孤。祖哀之名曰愍孫。嘗慕荀奉倩之爲人。明帝立。乃請改爲粲字景倩。按晉荀粲字奉倩。文若之子。常評其父或不如從兄攸。謂婦人者。材知不足稱。自以色爲主。卒哭盡婦以殯其身。其人可知。不識袁公曷懿而尚之。至輕移其祖之命乎。夫曰愍志孤也。且宜盡然終身有家世之感焉。何忍忘之。君子已孤。不更名。而公爲此。蔑父祖矣。

唐李綱初名瑗。慕張綱爲人。改焉。字文紀。綱知有張

綱而不知有遽瑗何耶

宋劉湛負其才氣常慕汲黯崔瑗爲人故名長子曰黯字長孺第二子曰琰字季珪而末年狂悖乃至謀殺天子此豈黯琰二人所爲耶梁張稷弑東昏召梁武尋篡後爲中丞陸杲所彈稷內慙口實乃名其子伊字懷君霍字希光以族其志恐伊霍之志正不如此

孔子於諸弟子皆名惟語於閔子騫記於子游特字蓋記者誤立醫問先生因謂孔子於弟子只稱名

御道
卷本
幾家

先

陽明

至程門便有秀才賢輩諸君等稱呼余按不止如此孔子於弟子直爾汝之孟子去孔子無幾時已是稱子至文中子又稱房玄齡杜如晦魏徵爲先輩朱子去程子又亡幾時其稱門人往往曰公又呼廖德明余大雅輩老兄則師道至今不知更幾變矣

史多遺人之字

漢初功臣惟張良見字高祖故獨以字傳然亦有間見當世稱謂語作史者偶未詳耳按漢世有楊王孫馮唐子遂字王孫竇嬰字王孫韓嫣字王孫漂

易曰吾哀王孫而進食安知不字信也後漢有徐孺子其它以孺字者何限里社父曰善陳孺子之爲宰安知其不爲平字也

陳勝項梁起鉅野澤間

少年相聚百人往從彭越曰請仲爲長則仲者越

字也

父母
字其
子

古人父母字其子如東漢趙苞傳苞母遥謂苞曰威豪人各有命何得相顧陳太丘曰元方難兄季方難弟南宋何尚之傳何叔度曰此自送吏部郎耳非關何彥德也北齊斛律金傳金每稱其二子光

羨曰。明月豐樂諸書傳中如此者亦多。

漢書鼂錯遷御史大夫而父從潁川來。謂錯語必稱

公霍去病爲驃騎將軍擊匈奴。道出河東至平陽

傳舍遣吏迎父中孺而中孺過入輒拜謁至扶服

叩頭自謂老臣謂去病將軍出舍翁驟見其子富

貴過不自重一如此亦見道濟俗降勢利行人父

子間久矣。

後世有名偶與先賢同者或出於父命不可改復同

其字則罪矣。褚淵字彥回司馬伋字季思是也。至

名同

交敬

齊丘又字超回。伏几襲裳。蓋不足言矣。

言今進呈文字。若試錄。或疏奏。有及宋元以上臣
合名。予曰。此後世之陋也。何休注公羊曰。禮臣死
君字之。記玉藻云。士於君所言大夫歿矣。則稱謚。
若字。古者卒哭諱行。雖稱人臣於當代之君。且猶
不名。況前賢乎。

古者謚以易名。名終則將諱之。亦以人之行。至死而
始見其大小真偽。故曰蓋棺事始定也。春秋衛靈
公薨。卜葬於故墓。不吉。卜葬沙丘。掘之數仞。得石。

榔洗而視之有名曰不馮其子靈公奪我里梁武帝之始生也有文在其手曰武帝然則靈公之靈武帝之武前定乎

後世自後徽號

漢南粵尉佗自稱武帝晉豫章黃範自稱孝神皇帝宋儂智高僭號仁惠皇帝生謚乎然彼偷安知禮也後世則穆然帝且王矣乃侈為號以自徽至數十字有加焉亦風其臣下為之可嗤也

寺人得謚之始

漢宣帝以保護恩追賜掖庭令張賀謚曰陽都哀侯此寺人得謚之始與蘇明允以為起自東漢之孫

程非也。至宋謚者則什八九矣。

揚雄之揚字從材。楊修關西之後乃云修家子雲是。且自不識其姓矣。慈湖云自古挑才揚。暨漢多書木才木所不同。一音貫吳蜀。大道無異同。奚自析耳目。苟惡姓氏之析耳目。則聖王別生分姓誠贅矣。

不識
姓中
字

鼃錯之鼃亦作朝。袁盎之袁亦作爰。揚雄之揚非楊也。楊震之楊非揚也。震孫修乃曰家子雲是不識雄姓也。苻堅之苻非符也。符融後漢之符非苻也。

嚴叶
莊韻

顏真卿云。從草爲姓。從竹爲印。是不識融姓也。

東漢嚴光嚴遵本皆姓莊。避明帝諱。故改。愚按朱子語錄云。詩云。下民有嚴。叶不敢迫遑。吳才老欲去嚴爲莊。云。避漢諱。却無道理。其後來讀楚詞。天問。見一嚴字。乃押從莊字。乃知是叶韻。嚴讀作昂也。然姓氏原無叶韻。

薛瑄
音義

漢書音義稱臣瓚者。裴駰以爲莫知姓氏。劉孝標則曰。于瓚。司馬貞曰。傅瓚。水經注屢引用之。則曰薛瓚。按晉書穆帝八年。書大原薛瓚者。其人也。史炤

文曰。璣主璣也。不以爲人姓名。可笑。

有習鑿齒。按山海經云。大荒之中。有山名曰融。天
海水南入焉。有人曰鑿齒。羿殺之。宋有樂黃目。按
明堂位云。周以黃目。古者以黃目爲鬱氣之上尊。
黃目。龜也。以爲人名可乎。

辨歐陽修名字

校正居士集者。謂十六卷薦蘇軾制科云。行業修飾。
說文以修爲飾。以脩爲脯。篇韻修兼訓長。故公字
永叔。今文集多以脩爲修。不敢輕改者。蓋當時集
古錄千卷。皆有公之名。印視其篆文。乃從攸從彡。

未嘗從月。而漢武帝策仲舒亦云何修何飾。古字簡少。殆可通用。公亦嘗全用此句。非如後人之拘也。予按正韻。修。脯也。又長也。飭也。洵也。葺也。修。飭也。通作脩。則兩字本通用。然脩可爲飭。而修不可爲脯。此又其別也。公之名自當作修。公字蓋取於虞書慎厥身。修思永。非長義也。穆參軍則名脩。乃字伯長也。

訂東坡老
石林燕語。蘇子瞻謫黃州。號東坡居士。東坡其所居地也。晚又號老泉山人。以眉山先塋有老翁泉故。

云按世稱東坡父明允曰老泉據此則明允未嘗
自號老泉乃後人妄加以別於東坡濠城不知
東坡已別號老泉也雖明允嘗作老翁井銘并叙
見集中深寄意焉然寔未嘗以爲號子瞻旣號東
坡晚年顛蹶衰落之餘又寓號於此豈其先壠所
在有狐首之思與然則公異時自海外歸遂僑於
常終厝於穎非公志也

金壘子下篇卷之三十四